



Broj/Broj: 03/1,03/11-05-277-1/08  
Sarajevo/Capajevu: 23.6.2008. godine

### -Članovima Zajedničke komisije za odbranu i sigurnost BiH

**PREDMET: Informacija o posjeti komandanta EUFOR-a u BiH general-majora Martina Villalaina Zajedničkoj komisiji za odbranu i sigurnost BiH**

Članovi Zajedničke komisije za odbranu i sigurnost BiH, 23.6.2008., održali su sastanak s komandantom EUFOR-a u BiH general-majorom Martinom Villalainom. Osim generala Villalaina, u delegaciji EUFOR-a u BiH bili su još Miguel Martin Bernarti i Anibal Villalba.

Iz Zajedničke komisije sastanku su prisustvovali: Branko Zrno, predsjedavajući Zajedničke komisije za odbranu i sigurnost, Šefik Džaferović, prvi zamjenik predsjedavajućeg, Slobodan Šaraba, drugi zamjenik predsjedavajućeg, Mirko Okolić i Adem Huskić, članovi Zajedničke komisije, Dragica Hinić, sekretar, i Jovica Katić, stručni saradnik.

Sastanku su prisustvovali i Sanja Kazazić Ćatibović i Dušan Zoller iz Misije OSCE-a u BiH, te John Partin iz NATO-a.

**Branko Zrno** je, na početku uvodnog izlaganja, izrazio saučešće zbog tragične smrti pripadnika EUFOR-a. Naveo je da su se članovi Zajedničke komisije za odbranu i sigurnost imali priliku i na terenu upoznati s aktivnostima LOT tima švicarske vojske lociranog u Bugojnu. Iz prezentacija koje su članovi Komisije dobili tom prilikom jasno je s koliko predanosti vojnici EUFOR-a rade na terenu i koliko su u funkciji građana i BiH u cjelini. Istakao je da je Zajednička komisija stalno na terenu i da je dobro upoznata sa stanjem u Ministarstvu odbrane BiH, Oružanim snagama BiH, Ministarstvu sigurnosti BiH, bh. policijskim agencijama na nivou BiH, nastojeći im svojim djelovanjem pomoći u radu kako bi sigurnosna situacija u zemlji bila što bolja. Zaključio je da potpisivanje Sporazuma o stabilizaciji i pridruživanju, 16. juna 2008., predstavlja početak našeg puta ka Evropskoj uniji, pri čemu treba mijenjati i prilagođavati mnogo oblasti, sa čim su članovi Komisije potpuno saglasni.

**General Villalain** zahvalio se članovima Zajedničke komisije na izrazima saučešća koje su uputili povodom pogibije vojnika EUFOR-a u BiH, kao i na pruženoj prilici da im se obrati. U svom izlaganju pozdravio je napore BiH na putu u punopravno članstvo NATO-a, kao i slijedom toga postignute rezultate na Samitu NATO-a u Bukureštu. Govoreći o radu i ulozi EUFOR-a u BiH, istakao je da je ključni vojni zadatok misije ALTEA, koja predstavlja dio programa ESDP-a pod okriljem EU, onemogućavanje ponovne eskalacije nasilja u BiH. On je naglasio da se od decembra 2004., kada je misija EUFOR-a počela djelovati, sigurnosna situacija u BiH značajno poboljšala. U tom smislu EUFOR pruža stalnu pomoć bh. vlastima prilikom hapšenja lica optuženih za ratne zločine u BiH, a Uredu visokog predstavnika pruža podršku u realizaciji njegove misije. Govorio je i o vojnoj misiji Evropske unije u BiH, stanju pokretne i nepokretne vojne imovine i viška naoružanja i municije.

Naglasio je da je EUFOR do danas prenio gotovo sve nadležnosti i odgovornosti na domaće institucije vlasti, te da je u tom smislu potpisano više sporazuma i protokola. Ostala je još samo jedna nadležnost koja treba da bude prenesena, a to je kontrola kretanja oružja i vojne opreme na komercijalnoj osnovi ili tzv. civilna kontrola kretanja naoružanja. Napomenuo je da Radna grupa, u

kojoj učestvuju i predstavnici EUFOR-a, završava posao na usaglašavanju odredbi teksta zakona kojim se regulira ova oblast i izrazio nadu da će i ovo pitanje vrlo brzo biti preneseno na domaće vlasti. Radi otklanjanja nedoumica, naveo je da se ovim zakonom ne predviđa prijenos nadležnosti s entitetskih ministarstava unutrašnjih poslova i odbrane i prebacivanje njihovih nadležnosti na državna ministarstva, već se prvenstveno prenosi nadležnost s EUFOR-a na Ministarstvo sigurnosti BiH.

**Branko Zrno** zahvalio se general-majoru Villalainu što je članove Komisije upoznao s problemima koji još uvijek postoje, a to se, prije svega, odnosi na višak naoružanja i municije, te pitanje pokretne i nepokretne vojne imovine, naglašavajući da nerješavanje tih problema dodatno usporava put BiH ka NATO-u. Ono što naročito ohrabruje jeste informacija da su domaće vojne snage preuzele sve odgovornosti od EUFOR-a osim jedne: kontrole kretanja oružja i vojne opreme, napominjući da će se zakon kojim se regulira ova oblast biti predmet razmatranja na današnjoj sjednici Zajedničke komisije ako Radna grupa koja radi na doradi njegovog teksta do tada završi svoj posao.

**Šefik Džaferović** naveo je da se misija EUFOR-a u BiH ogleda u pomoći Bosni i Hercegovini, kako bi se ona stabilizirala i krenula sama prema euroatlantskim integracijama, na čemu su im građani BiH vrlo zahvalni. Posebno ga raduje navedena činjenica da se Prijedlogom zakona o kontroli krenja oružja i vojne opreme vrši prijenos nadležnosti s EUFOR-a na institucije BiH, vodeći pri tome računa da to nema nikakvih dodatnih implikacija na mir i sigurnost u BiH. Volio bi u tom slučaju da svi poslanici i delegati u Parlamentarnoj skupštini BiH shvate da se usvajanjem ovog zakona ne prenose nadležnosti s entiteta, već s EUFOR-a na državu Bosnu i Hercegovinu, te da je to ključna činjenica na kojoj će se zasnovati rješavanje ovog pitanja.

**Slobodan Šaraba** izrazio je zadovoljstvo informacijama koje je prezentirao general-major Villalain, navodeći da se time potvrđuje činjenica da Oružane snage BiH, prihvatanjem nadležnosti koje su prenesene na njih s EUFOR-a, imaju snagu samostalno obavljati ovaj dio ovlaštenja. Kao rezultat dosadašnjih dogovora o tekstu ovog zakona, danas imamo prijedlog amandmana na ovaj zakon koji su došli iz Republike Srpske, a koji odražavaju želju predstavnika ovog entiteta da se njime poboljša tekst Prijedloga zakona. Izrazio je vjerovanje da će postojati razumijevanje kod članova Radne grupe koji rade na izradi teksta zakona kada su ovi amandmani u pitanju, kako bi se i ovo pitanje što prije riješilo.

**Mirko Okolić** zahvalio se generalu na dosadašnjem trudu i pomoći koji je misija EUFOR-a pružila u Bosni i Hercegovini. Naveo je da ga je impresionirao EUFOR-ov pristup rješavanju problema kada je u pitanju Zakon o kretanju naoružanja i vojne opreme, u kojem su on i njegovi saradnici, čim su osjetili da postoje određeni problemi u njegovom donošenju, zatražili sastanak sa Zajedničkom komisijom, kako bi ih nastojali zajednički otkloniti. Ocenjio je to dobrom pristupom i izrazio vjerovanje da će tako zajedno doći brzo do konačnog teksta Prijedloga zakona.

**Adem Huskić** naveo je da su građani BiH duboko svjesni onoga što su UNPROFOR, zatim IFOR i SFOR, i na kraju EUFOR, napravili u BiH. Građani BiH vrlo su emotivno primili vijest o smrti vojnika EUFOR-a, te je izrazio nadu da će to biti posljednji životi koji su dati za mir u Bosni i Hercegovini. Koliki je bio uticaj međunarodnih snaga u mirovnoj misiji u BiH najbolje govori činjenica da i Bosna i Hercegovina danas ima svoje vojnike u mirovnim misijama u inozemstvu.

**Branko Zrno** zaključio je da su članovi Zajedničke komisije u dosadašnjem periodu nailazili na različite probleme, a danas su došli u situaciju da rješavaju pitanje zakona kojim treba prenijeti posljednju nadležnost s međunarodnih snaga na domaće institucije. To dovoljno govori o tome šta se sve dešavalo u BiH u posljednjih pet godina i o kakvom napretku na polju odbrane, ali i u drugim oblastima se radi. EUFOR-u i međunarodnoj zajednici u BiH u cjelini pripada ogroman dio zahvalnosti za to. Na kraju sastanka zahvalio se komandatu EUFOR-a na njihovom dosadašnjem angažmanu i izrazio nadu da prilikom narednog susreta više neće biti razgovora o jednom neriješenom pitanju - Zakonu o kontroli kretanja oružja i vojne opreme.

Predsjedavajući  
Zajedničke komisije  
**Branko Zrno**